

四庫全書

史部

欽定四庫全書

史部

史記集解卷三十五至

九

詳校官侍讀學士_臣陸伯燾

洗馬_臣王坦修覆勘

總校官檢討_臣何思鈞

校對官待詔_臣胡士震

謄錄監生_臣黃其榮

欽定四庫全書

史記集解卷三十五

宋 裴駰 撰

史記三十五

管蔡世家第五

管叔鮮蔡叔度者周文王子而武王弟也武王同母兄弟十人母曰太姒文王正妃也其長子曰伯邑考次曰武王發次曰管叔鮮次曰周公旦次曰蔡叔度次曰曹

叔振鐸次曰成叔武次曰霍叔處次曰康叔封次曰冉
季載冉季載最少同母兄弟十人唯發旦賢左右輔文王
故文王舍伯邑考而以發為太子及文王崩而發立是為
武王伯邑考既已前卒矣武王已克殷紂平天下封功臣
昆弟於是封叔鮮於管封叔度於蔡二人相紂子武庚祿
父治殷遺民封叔旦於魯而相周為周公封叔振鐸於曹
封叔武於成封叔處於霍康叔封冉季載皆少未得封武
王既崩成王少周公旦專王室管叔蔡叔疑周公之為不

利於成王乃挾武庚以作亂周公旦承成王命伐誅武庚
殺管叔而放蔡叔遷之與車十乘徒七十人從而分殷餘
民為二其一封微子啟於宋以續殷祀其一封康叔為衛
君是為衛康叔封季載於冉冉季康叔皆有馴行於是周
公舉康叔為周司寇冉季為周司空以佐成王治皆有令
名於天下蔡叔度既遷而死其子曰胡胡乃改行率德馴
善周公聞之而舉胡以為魯卿士魯國治於是周公言於
成王復封胡於蔡以奉蔡叔之祀是為蔡仲餘五叔皆

就國無為天子吏者蔡仲卒子蔡伯荒立蔡伯荒卒子宮
侯立宮侯卒子厲侯立厲侯卒子武侯立武侯之時周厲
王失國奔彘共和行政諸侯多叛周武侯卒子夷侯立夷侯
十一年周宣王即位二十八年夷侯卒子釐侯所事立
釐侯三十九年周幽王為犬戎所殺周室卑而東徙秦始
得列為諸侯四十八年釐侯卒子共侯興立共侯二年卒
子戴侯立戴侯十年卒子宣侯措父立宣侯二十八年魯
隱公初立三十五年宣侯卒子桓侯封人立桓侯三年魯

弑其君隱公二十年桓侯卒弟哀侯獻舞立哀侯十一

年初哀侯娶陳息侯亦娶陳

杜預曰息國汝南新息縣

息夫人將歸

過蔡蔡侯不敬息侯怒請楚文王來伐我我求救於蔡
蔡必來楚因擊之可以有功楚文王從之虜蔡哀侯以
歸哀侯留九歲死於楚凡立二十年卒蔡人立其子肝
是為繆侯繆侯以其女弟為齊桓公夫人十八年齊桓
公與蔡女戲船中夫人蕩舟桓公止之不止公怒歸蔡
女而不絕也蔡侯怒嫁其妹齊桓公怒伐蔡蔡潰遂虜

繆侯南至楚郢陵已而諸侯為蔡謝齊侯歸蔡侯二十九年繆侯卒子莊侯甲午立莊侯三年齊桓公卒十四年晉文公敗楚於城濮二十年楚太子商臣弑其父成王代立二十五年秦穆公卒三十三年楚莊王即位三十四年莊侯卒子文侯申立文侯十四年楚莊王伐陳殺夏徵舒十五年楚圍鄭鄭降楚楚復醢之二十年文侯卒子景侯同立景侯元年楚莊王卒二十九年景侯為太子般娶婦於楚而景侯通焉太子弑景侯而自

立是為靈侯靈侯二年楚公子圍弑其王郢敖而自立
為靈王九年陳司徒招弑其君哀公楚使公子棄疾滅
陳而有之十二年楚靈王以靈侯弑其父誘蔡靈侯于
申伏甲飲之醉而殺之刑其士卒七十人令公子棄疾
圍蔡十一月滅蔡使棄疾為蔡公楚滅蔡三歲楚公子
棄疾弑其君靈王代立為平王平王乃求蔡景侯少子
廬立之是為平侯

宋忠曰平侯徙下蔡

是年楚亦復立陳楚平王

初立欲親諸侯故復立陳蔡後

世本曰平侯者靈侯般之孫太子友之子平

侯九年卒靈侯般之孫東國攻平侯子而自立是為悼
侯悼侯父曰隱太子友隱太子友者靈侯之太子平侯
立而殺隱太子故平侯卒而隱太子之子東國攻平侯
子而代立是為悼侯悼侯三年卒弟昭侯申立昭侯十
年朝楚昭王持美裘二獻其一於昭王而自衣其一楚
相子常欲之不與子常讒蔡侯留之楚三年蔡侯知之
乃獻其裘於子常子常受之乃言歸蔡侯蔡侯歸而之
晉請與晉伐楚十三年春與衛靈公會卻陵蔡侯私於

周襄弘以求長於衛

服虔曰載書使蔡在衛上

衛使史鮪言康叔之

功德乃長衛夏為晉滅沈

杜預曰汝南平輿縣有邲亭

楚怒攻蔡蔡

昭侯使其子為質於吳以共伐楚冬與吳王闔閭遂破

楚入郢蔡怨子常子常恐奔鄭十四年吳去而楚昭王

復國十六年楚令尹為其民泣以謀蔡蔡昭侯懼二十

六年孔子如蔡楚昭王伐蔡蔡恐告急於吳吳為蔡遠

約遷以自近易以相救昭侯私許不與大夫計吳人來

救蔡因遷蔡于州來二十八年昭侯將朝于吳大夫恐

其復遷乃令賊利殺昭侯已而誅賊利以解過而立昭

侯子朔是為成侯

徐廣曰或作景

成侯四年宋滅曹十年齊田

常弒其君簡公十三年楚滅陳十九年成侯卒子聲侯

立聲侯十五年卒子元侯立元侯六年卒子侯齊立

侯齊四年楚惠王滅蔡蔡侯齊亡蔡遂絕祀後陳滅三

十三年

伯邑考其後不知所封武王發其後為周有本紀言管

叔鮮作亂誅死無後周公旦其後為魯有世家言蔡叔

度其後為蔡有世家言曹叔振鐸其後為曹有世家言
成叔武其後世無所見霍叔處其後晉獻公時滅霍康
叔封其後為衛有世家言冉季載其後世無所見

太史公曰管蔡作亂無足載者然周武王崩成王少天
下既疑賴同母之弟成叔冉季之屬十人為輔拂是以
諸侯卒宗周故附之世家言

曹叔世家

曹叔振鐸者周武王弟也武王已克殷紂封叔振鐸於

曹

宋忠曰濟陽定陶縣

叔振鐸卒子太伯脾立太伯脾卒子仲君平

立仲君平卒子宮伯侯立宮伯侯卒子孝伯雲立孝伯

雲卒子夷伯喜立夷伯二十三年周厲王奔于彘三十

年卒弟幽伯強立幽伯九年弟蘓殺幽伯代立是為戴

伯戴伯元年周宣王已立三歲三十年戴伯卒子惠伯

兕立

孫檢曰兕音徐子反曹惠伯或名雉或名弟或復名弟兕也

惠伯二十五年周

幽王為犬戎所殺因東徙益卑諸侯畔之秦始皇列為諸

侯三十六年惠伯卒子石甫立其弟武殺之代立是為

繆公繆公三年卒子桓公終生立

孫檢云一作終涅涅音生

桓公三

十五年魯隱公立四十五年魯弑其君隱公四十六年

宋華父督弑其君殤公及孔父五十五年桓公卒子莊

公夕姑立莊公二十三年晉桓公始霸三十一年莊公

卒子釐公夷立釐公九年卒子昭公斑立昭公六年齊

桓公敗蔡遂至楚台陵九年昭公卒子共公襄立共公

十六年初晉公子重耳其亡過曹曹君無禮欲觀其駢

脅

韋昭曰駢者并幹也

釐負駢諫不聽私善於重耳二十一年晉

文公重耳伐曹虜共公以歸令軍毋入釐負羈之宗族
閭或說晉文公曰昔齊桓公會諸侯復異姓今君囚曹
君滅同姓何以令於諸侯晉乃復歸共公二十五年晉
文公卒三十五年共公卒子文公壽立文公二十三年
卒子宣公彊立宣公十七年卒弟成公負芻立成公三
年晉厲公伐曹虜成公以歸已復釋之五年晉欒書中
行偃使程滑弑其君厲公二十三年成公卒子武公勝
立武公二十六年楚公子棄疾弑其君靈王代立二十

七年武公卒子平公頃立平公四年卒子悼公午立是
歲宋衛陳鄭皆火悼公八年宋景公立九年悼公朝於
宋宋囚之曹立其弟野是為聲公悼公死於宋歸葬聲
公五年平公弟通弑聲公代立是為隱公隱公四年聲
公弟露弑隱公代立是為靖公靖公四年卒子伯陽立
伯陽三年國人有夢衆君子立于社宮

賈逵曰社宮社
也鄭衆曰社宮

中有室
屋者

謀欲亡曹曹叔振鐸止之請待公孫彊許之旦

求之曹無此人夢者戒其子曰我亡爾聞公孫彊為政

必去曹無罹曹禍及伯陽即位好田弋之事六年曹野
人公孫彊亦好田弋獲白雁而獻之且言田弋之說因
訪政事伯陽大說之有寵使為司城以聽政夢者之子
乃亡去公孫彊言霸說於曹伯十四年曹伯從之乃背
晉于宋賈逵曰以宋景公伐之晉人不救十五年宋滅
曹執曹伯陽及公孫彊以歸而殺之曹遂絕其祀

太史公曰余尋曹共公之不用僖負羈乃乘軒者三百
人知唯德之不建及振鐸之夢豈不欲引曹之祀者哉

如公孫彊不修厥政叔鐸之祀忽諸

史記集解卷三十五

欽定四庫全書

史記集解卷三十六

宋 裴駰 撰

史記三十六

陳杞世家第六

陳胡公滿者虞帝舜之後也昔舜為庶人時堯妻之二女居于媯汭其後因為氏姓姓媯氏舜已崩傳禹天下而舜子商均為封國夏后之時或失或續至于周武王克殷紂

乃復求舜後得嫡滿封之於陳以奉帝舜祀是為胡公胡公卒子申公犀侯立申公卒弟相公舉羊立相公卒立申公子突是為孝公孝公卒子慎公圉戎立慎公立當周厲王時慎公卒子幽公寧立幽公十二年周厲王奔于彘二十三年幽公卒子釐公孝立釐公六年周宣王即位三十六年釐公卒子武公靈立武公十五年卒子夷公說立是歲周幽王即位夷公三年卒弟平公變立平公七年周幽王為犬戎所殺周東徙秦始列為諸侯二十三年平公卒

子文公國立文公元年取蔡女生子佗十年文公卒長子桓公鮑立桓公二十三年魯隱公初立二十六年衛殺其君州吁三十三年魯弑其君隱公三十八年正月甲戌己丑陳桓公鮑卒桓公弟佗其母蔡女故蔡人為佗殺

五父及桓公太子免而立佗

譙周曰春秋傳謂佗即五父世家與傳違

是為

厲公桓公病而亂作國人分散故再赴

徐廣曰班氏云厲公躍者桓公

之弟也

厲公二年生子敬仲完周太史過陳陳厲公使以

周易筮之卦得觀之否是為觀國之光利用賓于王此

其代陳有國乎不在此其在異國非此其身在其子孫

若在異國必姜姓姜姓太嶽之後

杜預曰姜姓之先為堯四嶽

物莫

能兩大陳衰此其昌乎厲公取蔡女蔡女與蔡人亂厲

公數如蔡淫七年厲公所殺桓公太子免之三弟長曰

躍中曰林少曰杵臼共令蔡人誘厲公以好女與蔡人

共殺厲公

公羊傳曰淫于蔡蔡人殺人

而立躍是為利公利公者桓

公子也利公立五月卒立中弟林是為莊公莊公七年

卒少弟杵臼立是為宣公宣公三年楚武王卒楚始彊

十七年周惠王娶陳女為后二十一年宣公後有嬖姬

生子款欲立之乃殺其太子禦寇禦寇素愛厲公子完

完懼禍及已乃奔齊齊桓公欲使陳完為卿完曰羈旅

之臣賈逵曰羈寄旅客也幸得免負擔君之惠也不敢當高位桓

公使為工正齊懿仲欲妻陳敬仲卜之占曰是謂鳳皇

于飛和鳴鏘鏘杜預曰雄曰鳳雌曰皇雄雌俱飛相和而鳴鏘鏘然也猶敬仲夫妻有聲譽

有媯之後將育于姜杜預曰媯陳姓姜齊姓五世其昌並於正卿

服虔曰言完後八世之後莫之與京賈逵曰京大也三十七年

齊桓公伐蔡蔡敗南侵楚至召陵還過陳陳大夫轅濤
塗惡其過陳詐齊令出東道東道惡桓公怒執陳轅濤
塗是歲晉獻公殺其太子申生四十五年宣公卒子欽
立是為穆公穆公五年齊桓公卒十六年晉文公敗楚
師于城濮是歲穆公卒子共公朔立共公六年楚太子
商臣弑其父成王代立是為穆王十一年秦穆公卒十
八年共公卒子靈公平國立靈公元年楚莊王即位六
年楚伐陳十年陳及楚平十四年靈公與其大夫孔寧

儀行父皆通於夏姬衷其衣以戲於朝

左傳曰衷其相服救梁傳曰或

衣其衣或中其襦

泄治諫曰君臣淫亂民何效焉靈公以告二

子二子請殺泄治公弗禁遂殺泄治

春秋曰陳殺其大夫泄治

十五

年靈公與二子飲於夏氏公戲二子曰徵舒似汝二子

曰亦似公

杜預曰靈公即位十五年徵舒已為卿年大無嫌是公子也蓋以夏姬淫放故謂其子多

似以為戲也

徵舒怒靈公罷酒出徵舒伏弩廐門射殺靈公

左傳曰公出自其廐

孔寧儀行父皆奔楚靈公太子午奔晉徵舒

自立為陳侯徵舒故陳大夫也夏姬御叔之妻舒之母

也成公元年冬楚莊王為夏徵舒殺靈公率諸侯伐陳
謂陳曰無驚吾誅徵舒而已已誅徵舒因縣陳而有之
羣臣畢賀申叔時使於齊來還獨不賀

賈逵曰叔時楚大夫

莊王

問其故對曰鄙語有之牽牛徑人田田主奪之牛徑則
有罪矣奪之牛不亦甚乎今王以徵舒為賊弑君故徵
兵諸侯以義伐之已而取之以利其地則後何以令於
天下是以不賀莊王曰善乃迎陳靈公太子午於晉而
立之復君陳如故是為成公孔子讀史記至楚復陳曰

賢哉楚莊王輕千乘之國而重一言二十八年楚莊王
卒二十九年陳倍楚盟三十年楚共王伐陳是歲陳公
卒子哀公弱立楚以陳喪罷兵去哀公三年楚圍陳復
釋之二十八年楚公子圍弑其君郟敖自立為靈王三
十四年初哀公娶鄭長姬生悼太子師少姬生偃二嬖
妾長妾生留少妾生勝留有寵哀公哀公屬之其弟司
徒招哀公病三月招殺悼太子立留為太子哀公怒欲
誅招招發兵圍守哀公哀公自經殺

徐廣曰三十三年時

招卒立

留為陳君四月陳使使赴楚楚靈王聞陳亂乃殺陳使

者使公子棄疾發兵伐陳陳君留奔鄭九月楚圍陳十

一月滅陳使棄疾為陳公招之殺悼太子也太子之子

名吳出奔晉晉平公問太史趙曰陳遂亡乎對曰陳顓

頊之族

服虔曰陳祖虞舜舜出顓頊故為顓頊之族

陳氏得政於齊乃卒亡

賈逵曰物莫能兩盛

自幕至于瞽叟無違命

賈逵曰幕舜後虞思也至于瞽叟無聞違

天命以廢絕者鄭衆曰幕舜之先也駟案國語賈義為長

舜重之以明德至於遂

賈逵

曰遂舜後蓋殷之興存舜之後而封遂言舜德乃至於遂也

世世守之及胡公周賜

之姓

杜預曰胡公滿遂之後也事周武王賜姓曰姬封之陳

使祀虞帝且盛德之

後必百世祀虞之世未也其在齊乎楚靈王滅陳五歲
楚公子棄疾弑靈王代立是為平王平王初立欲得和
諸侯乃求故陳悼太子師之子吳立為陳侯是為惠公
惠公立採續哀公卒時年而為元空籍五歲矣七年陳
火十五年吳王僚使公子光伐陳取胡沈而去二十八
年吳王闔閭與子胥敗楚入郢是年惠公卒子懷公柳
立懷公元年吳破楚在郢召陳侯陳侯欲往大夫曰吳

新得意楚王雖亡與陳有故不可倍懷公乃以疾謝吳
四年吳復召懷公懷公恐如吳吳怒其前不往留之因
卒吳陳乃立懷公之子越是為湣公湣公六年孔子適
陳吳王夫差伐陳取三邑而去十三年吳復來伐陳陳
告急楚楚昭王來救軍於城父吳師去是年楚昭王卒
於城父時孔子在陳十五年宋滅曹十六年吳王夫差
伐齊敗之艾陵使人召陳侯陳侯恐如吳楚伐陳二十
一年齊田常弑其君簡公二十三年楚之白公勝殺令

尹子西子蓼襲惠王葉公攻敗白公白公自殺二十四
年楚惠王復國以兵北伐殺陳湣公遂滅陳而有之是
歲孔子卒

杞東樓公者夏后禹之後苗裔也殷時或封或絕周武

王克殷紂求禹之後得東樓公封之於杞

宋公曰杞今陳留雍丘縣

也以奉夏后氏祀東樓公生西樓公西樓公生題公題

公生謀娶公

徐廣曰謀一作謨

謀娶公當周厲王時謀娶公生

武公武公立四十七年卒子靖公立靖公二十三年卒

子共公立共公八年卒子德公立

徐廣曰世本曰惠公

德公十八

年卒弟桓公姑容立

徐廣曰世本曰惠公立十八年生成公及桓公成公立十八年桓公

立十七年

桓公十七年卒子孝公苟立孝公十七年弟文公

益姑立文公十四年卒弟平公鬱立平公十八年卒子

悼公成立悼公十二年卒子隱公乞立七月隱公弟遂

弑隱公自立是為釐公釐公十九年卒子湣公維立湣

公十五年楚惠王滅陳十六年湣公弟閔路弑湣公代

立是為哀公哀公立十年卒湣公子欽立

徐廣曰欽一作逃

是

為出公出公十二年卒子簡公春立立一年楚惠王之
四十四年滅杞杞後陳亡三十四年杞小微其事不足
稱述舜之後周武王封之陳至楚惠王滅之有世家言
禹之後周武王封之杞楚惠王滅之有世家言契之後
為殷殷有本紀言殷破周封其後於宋齊湣公滅之有
世家言后稷之後為周秦昭王滅之有本紀言皋陶之
後或封英六楚穆王滅之無譜伯夷之後至周武王復
封於齊曰太公望陳氏滅之有世家言伯翳之後至周

平王時封為秦項羽滅之有本紀言垂益夔龍其後不知所封不見也右十一人者皆唐虞之際名有功德臣也其五人之後皆至帝王餘乃為顯諸侯滕薛騶夏殷周之間封也小不足齒列弗論也周武王時候伯尚子餘人及幽厲之後諸侯力攻相并江黃胡沈之屬不可勝數故弗采著于傳上

太史公曰舜之德可謂至矣禪位於夏而後世血食者歷三代及楚滅陳而田常得政於齊卒為建國百世不

絕苗裔茲有土者不乏焉至禹於周則祀微甚不足
數也楚惠王滅杞其後越王句踐興

史記集解卷三十六

欽定四庫全書

史記集解卷三十七

宋 裴駟 撰

史記三十七

衛康叔世家第七

衛康叔名封周武王同母少弟也其次尚有冉季冉季最少武王已克殷紂復以殷餘民封紂子武庚祿父比諸侯以奉其先祀勿絕為武庚未集恐其有賊心武王乃令其弟管叔蔡叔傅相

武庚祿父以和其民武王既崩成王少周公旦代成王治當國
管叔蔡叔疑周公乃與武庚祿父作亂欲攻成周周公旦以成
王命興師伐殷殺武庚祿父管叔放蔡叔以武庚餘民封
康叔為衛君居河淇間故商墟周公旦懼康叔齒少乃申告
康叔曰必求殷之賢人君子長者問其先殷所以興所以亡
而務愛民告以紂所以亡者以淫於酒酒之失婦人是用
故紂之亂自此始為梓材示君子可法則故謂之康誥酒
誥梓材以命之康叔之國既以此命能和集其民民大說

成王長用事舉康叔為周司寇賜衛寶祭器

左傳曰分康叔以大路大旂少

帛績後旂旌大呂賈遠曰大路金路也少帛雜帛也績後大赤也通帛為旂析羽為旌大呂鐘名鄭衆曰績後旂名

也

以章有德康叔卒子康伯代立康伯卒子考伯立考

伯卒子嗣伯立嗣伯卒子康

史記索隱曰音捷

伯立康伯卒子靖

伯立靖伯卒子貞伯立貞伯卒子頃侯立頃侯厚賂周夷

王夷王命衛為侯頃侯立十二年卒子釐侯立釐侯十三

年周厲王出奔于彘共和行政焉二十八年周宣王立四

十二年釐侯卒太子共伯餘立為君共伯弟和有寵於

釐侯多予之賂和以其賂賂士以襲攻共伯於墓上共伯入釐侯羨自殺衛人因葬之釐侯旁謚曰共伯而立和為衛侯是為武公武公即位修康叔之政百姓和集四十二年犬戎殺周幽王武公將兵往佐周平戎甚有功周平王命武公為公五十五年卒子莊公揚立莊公五年取齊女為夫人好而無子又取陳女為夫人生子蚤死陳女女弟亦幸於莊公而生子完完母死莊公令夫人齊女子之立為太子莊公有寵妾生子州吁十八年州吁長好兵莊公使將

石碯諫莊公

賈逵曰石碯為上卿

曰庶子好兵使將亂自此起不

聽二十三年莊公卒太子完立是為桓公桓公二年弟州吁驕奢桓公絀之州吁出奔十三年鄭伯弟段攻其兄不勝亡而州吁求與之友十六年州吁收聚衛亡人以襲殺桓公州吁自立為衛君為鄭伯弟段欲伐鄭請宋陳蔡與俱三國皆許州吁州吁新立好兵弑桓公衛人皆不愛石碯乃因桓公母家於陳詳為善州吁至鄭郊石碯與陳侯共謀使右宰醜進食因殺州吁于濮

服虔

曰右軍醜衛大夫濮陳地

而迎桓公弟晉於邢而立之

賈逵曰邢周公之胤姬姓

國是為宣公宣公七年魯弑其君隱公九年宋督弑其

君殤公及孔父十年晉曲沃莊伯弑其君哀侯十八年

初宣公愛夫人夷姜夷姜生子伋以為太子而令右公

子傅之右公子為太子取齊女未入室而宣公見所欲

為太子婦者好說而自取之更為太子取他女宣公得

齊女生子壽子朔令左公子傅之

杜預曰左右媵之子因以為號

太子

伋母死宣公正夫人與朔共讒惡太子伋宣公自以其

奪太子妻也心惡太子欲廢之及聞其惡大怒乃使太子伋於齊而令盜遮界上殺之與太子白旄而告界盜見持白旄者殺之且行子朔之兄壽太子異母弟也知朔之惡太子而君欲殺之乃謂太子曰界盜見太子白旄即殺太子太子可毋行太子曰逆父命求生不可遂行壽見太子不止乃盜其白旄而先馳至界界盜見其驗即殺之壽已死而太子伋又至謂盜曰所當殺乃我也盜并殺太子伋以報宣公宣公乃以子朔為太子十

九年宣公卒太子朔立是為惠公左右公子不平朔之立也惠公四年左右公子怨惠公之讒殺前太子伋而代立乃作亂攻惠公立太子伋之弟黔牟為君惠公奔齊衛君黔牟立八年齊襄公率諸侯奉王命共伐衛納衛惠公誅左右公子衛君黔牟奔于周惠公復立惠公立三年出亡亡八年復入與前通年凡十三年矣二十五年惠公怨周之容舍黔牟與燕伐周周惠王奔溫衛燕立惠王弟頹為王二十九年鄭復納惠王三十一年

惠公卒子懿公亦立懿公即位好鶴淫樂奢侈九年翟
伐衛衛懿公欲發兵兵或畔大臣言曰君好鶴鶴可令
擊翟於是遂入殺懿公懿公之立也百姓大臣皆不服
自懿公父惠公朔之讒殺太子伋代立至於懿公常欲
敗之卒滅惠公之後而更立黔牟之弟昭伯頑之子申
為君是為戴公戴公申元年卒齊桓以衛數亂乃率諸
侯代翟為衛築楚丘立戴公弟燬為衛君

賈誼書曰衛侯朝於周周

行人問其名答曰衛侯辟疆周行人還之曰啟疆辟疆天子之號諸侯弗得用衛侯更其名曰燬然後受之

是為文公文公以亂故犇齊齊人入之初翟殺懿公也
衛人憐之思復立宣公前死太子伋之後伋子又死而
伋伋死者子壽又無子太子伋同母弟二人其一曰黔
牟黔牟嘗代惠公為君八年復去其二曰昭伯昭伯黔
牟皆已前死故立昭伯子申為戴公戴公卒復立其弟
燬為文公文公初立輕賦平罪身自勞與百姓同苦以
收衛民十六年晉公子重耳過無禮十七年齊桓公卒
二十五年文公卒子成公鄭立成公三年晉欲假道於

衛救宋成公不許晉更從南河度

服虔曰南河濟南之東南流河也杜預曰

從汲郡南度出衛南

救宋徵師於衛衛大夫欲許成公不肯大夫

元咺攻成公成公出奔晉文公重耳伐衛分其地予宋
討前過無禮及不救宋患也衛成公遂出奔陳二歲如
周求入與晉文公會晉使人鳩衛成公成公私於周主
鳩令薄得不死已而周為請晉文公卒入之衛而誅元
喧衛君瑕出奔七年晉文公卒十二年成公朝晉襄公
十四年秦穆公卒二十六年齊邴歆弑其君懿公三十

五年成公卒

世本曰成公徙濮陽宋忠曰濮陽帝邱地名

子穆公邈立穆公

二年楚莊公伐陳殺夏徵舒三年楚莊王圍鄭鄭降復

釋之十一年孫良夫救魯伐齊復得侵地穆公卒子定

公臧立定公十二年卒子獻公衍立獻公十三年公令

師曹教官妾鼓琴

賈逵曰師曹樂人

妾不善曹筥之妾以幸惡

曹於公公亦筥曹三百十八年獻公戒孫文子甯惠子

食皆往曰盱不召

服虔曰孫文子林父也甯惠子甯殖也敕戒二子欲共晏食皆服朝衣待

命盱宴也

而去射鴻於囿二子從之

服虔曰從公於囿

公不釋射服

與之言

左傳曰不釋皮冠

二子怒如宿

服虔曰孫文子邑也

孫文子子數

侍公飲

左傳曰文子子即孫蒯也

使師曹歌巧言之卒章

杜預曰巧言詩小雅

也其卒章曰彼何人斯居河之康無奉無勇職為亂階公欲以警文子居河上而為亂

師曹又怒

公之嘗筮三百乃歌之欲以怒孫文子報衛獻公文子

語蘧伯玉伯玉曰臣不知也

賈逵曰伯玉衛大夫

遂攻出獻公獻

公奔齊齊置衛獻公於聚邑孫文子甯惠子共立定公

弟秋為衛君是為殤公

徐廣曰班氏云獻公弟蒧

殤公秋立封孫文

子林父於宿十二年甯喜與孫林父爭寵相惡殤公使

甯喜攻孫林父林父奔晉復求入故衛獻公獻公在齊
齊景公聞之與衛獻公如晉求入晉為伐衛誘與盟衛
殤公會晉平公平公執殤公與甯喜而復入衛獻公獻
公亡在外十二年而入獻公後元年誅甯喜三年吳延
陵季子使過衛見蘧伯玉史鰌曰衛多君子其國無故
過宿孫林父為擊磬曰不樂音大悲使衛亂乃此矣是
年獻公卒子襄公惡立襄公六年楚靈王會諸侯襄公
稱病不往九年襄公卒初襄公有賤妾幸之有身夢有

人謂曰我康叔也令若子必有衛名而子曰元妾怪之

問孔成子

服虔曰衛卿孔烝鉏

成子曰康叔者衛祖也及生子男

也以告襄公襄公曰天所置也名之曰元襄公夫人無

子於是乃立元為嗣是為靈公靈公五年朝晉昭公六

年楚公子棄疾弑靈王自立為平王十一年火三十八

年孔子來祿之如魯後有隙孔子去後復來三十九年

太子蒯瞶與靈公夫人南子有惡

賈逵曰南子宋女

欲殺南子

蒯瞶與其徒戲陽邀謀朝使殺夫人

賈逵曰戲陽邀太子家臣

戲陽

後悔不果蒯瞶數目之夫人覺之懼呼曰太子欲殺我

靈公怒太子蒯瞶犇宋已而之晉趙氏四十二年春靈

公游于郊令子郕僕

賢達曰僕御也

郕靈公少子也字子南靈

公怨太子出犇謂郕曰我將立若為後郕對曰郕不足

以辱社稷君更圖之

服虔曰郕自謂已無德不足立以汚辱社稷

夏靈公卒

夫人命子郕為太子曰此靈公命也郕曰亡人太子蒯

瞶之子輒在也不敢當於是衛乃以輒為君是為出公

六月乙酉趙簡子欲入蒯瞶乃令陽虎詐命衛十餘人

衰經歸

服虔曰衰經為若從衛來迎太子也

簡子送蒯瞶衛人聞之發兵

擊蒯瞶蒯瞶不得入入宿而保衛人亦罷兵出公輒四年齊田乞弑其君孺子八年齊鮑子弑其君悼公孔子自陳入衛九年孔文子問兵於仲尼仲尼不對其後魯迎仲尼仲尼反魯十二年初孔圉文子取太子蒯瞶之姊生悝孔氏之豎渾良夫美好孔文子卒良夫通於悝母太子在宿悝母使良夫於太子太子與良夫言曰苟能入我國報子以乘軒免子三死母所與

杜預曰軒大夫車也三死

三 死罪 與之盟許以悝母為妻閏月良夫與太子入舍孔

氏之外圃

服虔曰圃園

昏二人蒙衣而乘

服虔曰二人謂良夫太子蒙衣為婦

人之服巾蒙其頭而共乘也

宦者羅御如孔氏孔氏之老藥膏問之

服虔曰家臣稱老問其姓名

稱姻妾以告

賈逵曰婚姻家妾也

遂入適伯姬氏

服虔曰入孔氏家適伯姬所居

既食悝母杖戈而先

服虔曰先至孔悝所

太子與

五人介與假從之

賈逵曰介被甲也與假豚欲以盟

伯姬劫悝於廁強

盟之遂劫以登臺

服虔曰於術臺上召術羣臣

藥膏將飲酒炙未熟

聞亂使告仲由

服虔曰季路為孔氏邑宰故告之

召護駕乘車

服虔曰召護術

大夫駕乘車不駕兵車也言無距父之慮也

行爵食炙

服虔曰藥膏使召季路乃行爵食炙

奉

出公輒薛魯

服虔曰召薛本衛侯

仲由將入遇子羔將出

賈逵曰子羔衛

大夫高柴孔子弟子也將出奔

曰門已閉矣子路曰吾姑至矣

杜預曰且欲至

門子羔曰不及莫踐其難

賈逵曰言家臣憂不及國不得踐履其難鄭衆曰是時輒

以出不及事不當踐其難子羔言不及以為季路欲死國也

子路曰食馬不辟其難

服虔曰言食慳之祿欲救慳之難此明其不死國也

子羔遂出子路入及門公孫

敢闔門曰毋入為也

服虔曰公孫敢衛大夫言輒已出無為復入

子路曰是

公孫也求利而逃其難由不然利其祿必救其患有使

者出子路乃得入曰太子焉用孔悝雖殺之必或繼之

王肅曰必有繼續其後攻太子

且曰太子無勇若燔臺必舍孔叔太子

聞之懼下石乞孟賁敵子路

服虔曰二子蒯賁之臣敵當也

以戈擊之

割纓子路曰君子死冠不免

服虔曰不使冠在地

結纓而死孔子

聞衛亂曰嗟乎柴也其來乎由也其死矣孔悝竟立太

子蒯賁是為莊公莊公蒯賁者出公父也居外怨大夫

莫迎立元年即位欲盡誅大臣曰寡人居外久矣子亦

嘗聞之手羣臣欲作亂乃止二年魯孔丘卒三年莊公

上城見戎州

賈逵曰戎州戎人之邑

曰戎虜何為是戎州病之十

月戎州告趙簡子簡子圍衛十一月莊公出犇衛人立

公子斑師為衛君

左傳曰斑師襄公之孫

齊伐衛虜斑師更立公

子起為衛君

服虔曰起靈公子

衛君起元年衛石曼專逐其君

起起犇齊衛出公輒自齊復歸立初出公立十二年亡

亡在外四年復入出公後元年賞從亡者立二十一年

卒出公季父黔攻出公子而自立是為悼公悼公五年

卒子敬公弗立

世本云敬公費也

敬公十九年卒子昭公糾立

是時三晉彊衛如小侯屬之昭公六年公子亶弑之代
立是為懷公懷公十一年公子頽弑懷公而代立是為
慎公慎公父公子適適父敬公也慎公四十二年卒子
聲公訓立聲公十一年卒子成侯速立成侯十一年公
孫鞅入秦十六年衛更貶號曰侯二十九年成侯卒子
平侯立平侯八年卒子嗣君立嗣君五年更貶號曰君
獨有濮陽四十二年卒子懷君立懷君三十一年朝魏
魏囚殺懷君魏更立嗣君弟是為元君元君為魏壻故

魏立之

徐廣曰班氏云元君者懷君之弟

元君十四年秦拔魏東地秦

初置東郡更徙衛野王縣而并濮陽為東郡二十五年

元君卒子君角立

年表云元君十一年秦置東郡十二年徙野王二十三年卒

君角

九年秦并天下立為始皇帝二十一年二世廢君角為

庶人衛絕祀

太史公曰余讀世家言至於宣公之太子以婦見誅弟

壽爭死以相讓此與晉太子申生不敢明驪姬之過同

俱惡傷父之志然卒死亡何其悲也或父子相殺兄弟

相滅亦獨何哉

史記集解卷三十七

欽定四庫全書

史記集解卷三十八

宋 裴駰 撰

史記三十八

宋微子世家第八

微子開者

孔安國曰微畿內國名子爵也為紂卿士

殷帝乙之首子而紂之

庶兄也紂既立不明淫亂於政微子數諫紂不聽及祖

伊以周西伯昌之修德滅阮

徐廣曰阮音著

阮國懼禍至以告

紂紂曰我生不有命在天乎是何能為於是微子度紂

終不可諫欲死之及去未能自決乃問於太師少師

國曰太師三公箕子曰紂不有治政不治四方
孔安國曰少師孤卿比干也

不有治政四方之事終必亡也我祖遂陳於上

馬融曰我祖湯也孔安國曰言湯遂其功陳力
於上也紂沈湎於酒婦人是用亂敗湯德於下

馬融曰下世也殷既小大好草竊姦宄

孔安國曰草野盜竊又為姦宄於外內卿士師師

非度

馬融曰非但小人學為姦宄卿士已下轉相師效為非法度皆有罪辜乃無維

獲

鄭玄曰獲得也羣臣皆有是罪其爵祿又無常得之者言屢相攻奪小民乃並興相為

敵讎

孔安國曰卿士既亂而小民各起共為敵讐言不和小

今殷其典喪若涉水

無津涯

徐廣曰一作涉水無舟航言危也駟謂典國典也

殷遂喪越至于今

馬融

曰越於也於是至矣於今到矣

曰太師少師

馬融曰重呼告之

我其發出往

鄭玄

曰發起也紂禍敗如此我其起作出往也

吾家保于喪

徐廣曰一云於是家保駟案馬融曰卿大

夫稱家

今女無故告

王肅曰無意告我也

予顛躋如之何

其

馬融曰躋猶墜也恐顛墜於非義當如之何也鄭玄曰其語助也齊魯之間聲如姬禮記曰何居

太

師若曰王子天篤下菑亡殷國

孔安國曰微子帝乙子故曰王子天生紂為亂

是下菑也鄭玄曰少師不答志在必死

乃母畏畏不用老長

孔安國曰上不畏天菑下

不畏賢人違戾者
老之長不用其教

今殷民乃陋淫神祇之祀

徐廣曰一云今殷民

侵神犧又一云陋淫侵神祇駟案馬融曰天曰神地曰祇也

令誠得治國國治身死

不恨為死終不得治不如去遂亡箕子者

馬融曰箕國名也子爵也

紂親戚也紂始為象箸箕子歎曰彼為象箸必為玉柅

為柅則必思遠方珍怪之物而御之矣輿馬宮室之漸

自此始不可振也紂為淫佚箕子諫不聽人或曰可以

去矣箕子曰為人臣諫不聽而去是彰君之惡而自說

於民吾不忍為也乃被髮佯狂而為奴遂隱而鼓琴以

自悲故傳之曰箕子操

風俗通義曰其道閑塞憂愁而作者命其曲曰操操者言遇蓄

遭害困厄窮迫雖怨恨失意猶守禮義不懼不懾樂道而不改其操也

王子比干者亦紂

之親戚也見箕子諫不聽而為奴則曰君有過而不以死爭則百姓何辜乃直言諫紂紂怒曰吾聞聖人之心有七竅信有諸乎乃遂殺王子比干剗視其心微子曰父子有骨肉而臣主以義屬故父有過子三諫不聽則隨而號之人臣三諫不聽則其義可以去矣於是太師少師乃勸微子去遂行

時比干已死而云少師者似誤

周武王伐紂克

殷微子乃持其祭器造於軍門肉袒面縛左牽羊右把
茅膝行而前以告於是武王乃釋微子復其位如故武
王封紂子武庚祿父以續殷祀使管叔蔡叔傅相之武
王既克殷訪問箕子武王曰於乎維天陰定下民相和
其居

孔安國曰天不言而默定下民助合其居使有常生之資也

我不知其倫常所

序

孔安國曰言我不知天所以定民之常道理次序問何由

箕子對曰在昔鯀陟鴻

水汨陳其五行

孔安國曰陟塞汨亂也治水失道是亂陳五行

帝乃震怒不從

鴻範九等常倫所斁

徐廣曰一作釋駟案鄭玄曰帝天也天以鯀如是乃震動其威怒不

與天道大法九類言
王所問所由敗也
鯀則極死禹乃嗣興
鄭玄曰春秋傳曰舜之誅

也鯀鯀其天乃錫禹鴻範九等常倫所序
孔安國曰天與禹洛出書

也神龜負文而出列於背有數至
于九禹遂因而第之以成九類
初一日五行二曰五

事三曰八政四曰五紀五曰皇極六曰三德七曰稽疑

八曰庶徵九曰嚮用五福畏用六極
馬融曰言天所以畏懼人用六極

五行一曰水二曰火三曰木四曰金五曰土
鄭玄曰此數本諸陰

陽所生
之次也
水曰潤下火曰炎上
孔安國曰言其自然之常性也
木曰曲直

孔安國曰木可
揉使曲直也
金曰從革
馬融曰金之性從人而更可銷鑠
土曰稼穡

王肅曰種之曰稼斂之曰穡潤下作鹹孔安國曰水鹵所生炎上作苦孔安國曰焦氣

之曲直作酸孔安國曰木實之性從革作辛孔安國曰金氣之味稼穡作甘

孔安國曰甘味生於百穀五行以下箕子所陳五事一曰貌二曰言三曰視四

曰聽五曰思貌曰恭言曰從馬融曰發言當使可從視曰明聽曰

聰思曰睿馬融曰睿通也恭作肅從作治馬融曰出令而從所以為治也明作

智聰作謀孔安國曰所謀必成審也睿作聖孔安國曰於事無不

通謂之聖八政一曰食二曰貨三曰祀四曰司空馬融曰司空掌營城

郭主空土以居民五曰司徒孔安國曰主徒衆教以禮義六曰司寇馬融曰主誅寇

害

七曰賓

鄭玄曰掌諸侯朝覲之官

八曰師

鄭玄曰掌軍旅之官

五紀一曰歲

二曰月三曰日四曰星辰

馬融曰星二十八宿辰日月之所會也鄭玄曰星五星也

五曰歷數

孔安國曰歷數節氣之度以為歷數敬授民時

皇極皇建其有極

孔安

國曰大中之道大立其有中謂行九疇之義

敘時五福用傳錫其庶民

馬融

曰當敘是五福之道用布與衆民

維時其庶民于女極

馬融曰以其能敘是五福故衆

民於汝取中

錫女保極

鄭玄曰又賜女以守中之道

凡厥庶民毋有

淫朋人母有比德維皇作極

孔安國曰民有善則無淫過朋黨之惡此周之德惟

天下皆大為中正也

凡厥庶民有猷有為有守女則念之

馬融曰凡其衆

民有謀有所執守當思念其行有所趣舍也

不協于極不離于咎皇則受

之

孔安國曰凡民之行雖不合於中而不離於咎惡皆可進用大法受之

而安而色曰予

所好德女則錫之福

孔安國曰女當安女顏色以謙下人人曰我所好者德也女則與之

爵時人斯其維皇之極

孔安國曰不合于中之人女與之福則是人比其惟大之中言

不勉進也已

毋侮鰥寡而畏高明

馬融曰高明顯寵者不枉法畏之

人之有能有

為使羞其行而國其昌

王肅曰使進其行任之以政則國為之昌

凡厥正人既富

方穀

孔安國曰正直之人既當爵祿富之又當以善道接之

女不能使有好于而家時

人斯其章

孔安國曰不能使正人有好於國家則是人斯其詐取罪而去之也

于其毋好女雖

錫之福其作女用咎

鄭玄曰無好于女家之人雖賜之以爵祿其動作為女用惡謂為天子結怨於

民

毋偏毋頗遵王之義

孔安國曰偏不平頗不正言當修先王正義以治民

毋有作好

遵王之道

馬融曰好私好也

毋有作惡遵王之路毋偏毋黨王道蕩

蕩

孔安國曰言開辟也鄭玄曰黨朋黨

母黨母偏王道平平

孔安國曰一言辨治也

毋反毋

側王道正直

馬融曰反反道也側傾側也

會其有極

鄭玄曰謂君也當會聚有中之人以為臣

也

歸其有極

鄭玄曰謂臣也當就有中之君而事之

曰王極之傳言

馬融曰王者當盡極

行之使臣下布陳其言

是帝是訓于帝其順

馬融曰是大中而常行之用是教訓天下於天為順

也

凡厥庶民極之傳言

馬融曰亦當極數陳其言於上也

是順是行

王肅曰民

納言於上而得中者則順而行之

以近天子之光

王肅曰近猶益也順行民言所以益天子之光

曰天子作民父母以為天下王

王肅曰政教務中民善是用所以為民父母而為天

下所歸往

三德一曰正直

鄭玄曰中平之人

二曰剛克三曰柔克

鄭玄

曰克能也剛而能柔柔而能剛寬猛相濟以成治立功

平康正直

孔安國曰世平康用正直治之

彊不友剛克

孔安國曰友順也世彊禦不順以剛能治之

內友柔克

孔安國曰世和

順以柔能治之也

沈漸剛克

馬融曰沈陰也潛伏也陰伏之謀謂賊臣亂子非一朝一夕之漸君

親無將將而誅

高明柔克

馬融曰高明君子亦以德懷也

維辟作福維辟作威

維辟玉食

馬融曰辟君也玉食美食不言王者開諸侯也鄭玄曰作福專爵賞也作威專刑罰也玉

食備珍
美也

臣無有作福作威王食臣有作福作威王食其

害于而家凶于而國人用側頗辟民用僭忒

孔安國曰
在位不端

平則下
民僭差稽疑擇建立卜筮人

孔安國曰龜曰卜著曰筮
考正疑事當選擇知卜筮

人而建
立之

乃命卜筮曰雨曰濟曰涕

尚書
作圉

曰霧

徐廣曰一
曰涕曰被

曰克曰貞曰悔凡七卜五占之用二衍賁

鄭玄曰卜五
占之用謂雨

濟圉霧克也二衍賁謂貞悔也將立卜筮人乃先命名

兆卦而分別之兆卦之名凡七龜用五易用二審此道

者乃立之也雨者兆之體氣如雨然也濟者如雨止之

雲氣在上者也圉者色澤而光明也霧者氣不釋鬱真

冥也克者如禳氣之色相犯也內卦曰貞貞正也外卦

曰悔悔之言晦也晦猶終也卦象多變故言衍賁也

立時人為卜筮

鄭玄曰立是能分別兆卦之名者以為卜筮人

三人占則從二

人之言

鄭玄曰從其多者著龜之道幽微難明慎之深

女則有大疑謀及女心

謀及卿士謀及庶人謀及卜筮

孔安國曰先盡謀慮然後卜筮以決之

女

則從龜從筮從卿士從庶民從是之謂大同

孔安國曰大同於吉

而身其康強而子孫其逢吉

孔安國曰動不違衆故後世遇吉也

女則從

龜從筮從卿士逆庶民逆吉卿士從龜從筮從女則逆

庶民逆吉庶民從龜從筮從女則逆卿士逆吉

鄭玄曰此三者

皆從多故為吉

女則從龜從筮逆卿士逆庶民逆作內吉作外

凶

鄭玄曰此逆者多以故舉龜筮共違于人用靜吉用

作凶

孔安國曰安以守常則吉動則凶鄭玄曰龜筮皆與人謀相違人雖三從猶不可以舉事庶徵

曰雨曰暘曰輿曰寒曰風曰時

孔安國曰雨以潤物陽以乾物煖以長物寒以

成物風以動物五者各以時所以為衆驗五者來備各以其序庶草繁廡

國曰言五者備至各以次一極備凶一極亡凶孔安國曰一者

序則衆草木繁廡滋豐也一極備凶一極亡凶孔安國曰一者

備極過甚則凶一者極無不至曰休徵美行之驗曰

亦凶謂其不時失敘之謂也曰治時暘若孔安國曰君政

肅時雨若敬則時雨順之曰治時暘若治則時暘順之

曰知時輿若孔安國曰君昭曰謀時寒若能謀則時寒

順之曰聖時風若

孔安國曰君能通理則時風順之

曰咎徵

孔安國曰咎惡行之驗也

曰狂常雨若

孔安國曰君行狂妄則常雨順之

曰僭常暘若

孔安國曰君行僭差

則常暘順之

曰舒常奧若

孔安國曰君行逸豫則常煖順之

曰急常寒若

孔安

國曰君行急則常寒順之

曰霧常風若

孔安國曰君行霧闐則常風順之

王青維歲

馬融曰言王者所貴職如歲兼四時也

卿士維月

孔安國曰卿士各有所掌如月之有別

師

尹維日

孔安國曰衆正官之吏分治其職如日之有歲月也

歲月日時毋易

孔安國曰

各順常

百穀用成治用明

孔安國曰歲月無易則百穀成君臣無易則政治明

峻民

用章家用平康

孔安國曰賢臣顯用國家平寧

日月歲時既易百穀用

不成治用昏不明峻民用微家用不寧庶民維星

孔安國曰

星民象故衆民惟若星也

星有好風星有好雨

馬融曰箕星好風畢星好雨

日月之

行有冬有夏

孔安國曰日月之行冬夏各有常度

月之從星則以風雨

孔安

國曰月經于箕則多風離于畢則多雨政教失常以從民欲亦所以亂

五福一曰壽二曰

富三曰康寧

鄭玄曰康寧平安

四曰攸好德

孔安國曰所好者德福之道

五

曰考終命

孔安國曰各成其短長之命以自終不橫夭

六極一曰凶短折

鄭玄

曰未亂曰凶未冠曰短未婚曰折

二曰疾三曰憂四曰貧五曰惡

孔安國曰

惡醜陋也

六曰弱

鄭玄曰愚懦不壯毅曰弱

於是武王乃封箕子於朝鮮

而不臣也其後箕子朝周過故殷虛感宮室毀壞生禾黍箕子傷之欲哭則不可欲泣為其近婦人乃作麥秀之詩以歌詠之其詩曰麥秀漸漸兮禾黍油油彼狡僇兮不與我好兮所謂狡僇者紂也殷民聞之皆為流涕

杜預曰梁國蒙縣有箕子冢

武王崩成王少周公旦代行政當國管

蔡疑之乃與武庚作亂欲襲成王周公

徐廣曰一云欲襲成周

周

公既承成王命誅武庚殺管叔放蔡叔乃命微子開代殷後奉其先祀作微子之命以申之國于宋

世本曰宋更曰睢陽

微子故能仁賢乃代武庚故殷之餘民甚戴愛之微子

開卒立其弟衍是為微仲

禮記曰微子舍其孫臚而立衍也鄭玄曰微子適子死立

其弟衍殷禮也

微仲卒子宋公稽立宋公稽卒子丁公申立丁

公申卒子湣公共立湣公共卒弟煬公熙立煬公即位

湣公子鮒祀

徐廣曰鮒一作魴

殺煬公而自立曰我當立是為

厲公厲公卒子釐公舉立釐公十七年周厲王出奔彘

二十八年釐公卒子惠公覲立

徐廣曰覲音古覲反

惠公四年周

宣王即位三十年惠公卒子哀公立哀公元年卒子戴

公立戴公二十九年周幽王為犬戎所殺秦始列為諸侯三十四年戴公卒子武公司空立武公生女為魯惠公夫人生魯桓公十八年武公卒子宣公力立宣公有太子與夷十九年宣公病讓其弟和曰父死子繼兄死弟及天下通義也我其立和和亦三讓而受之宣公卒弟和立是為穆公穆公九年病召大司馬孔父謂曰先君宣公舍太子與夷而立我我不敢忘我死必立與夷也孔父曰羣臣皆願立公子馮穆公曰毋立馮吾不可

以負宣公於是穆公使馮出居于鄭八月庚辰穆公卒
兄宣公子與夷立是為殤公君子聞之曰宋宣公可謂
知人矣立其弟以成義然卒其子復享之殤公元年衛
公子州吁弑其君完自立欲得諸侯使告於宋曰馮在
鄭必為亂可與我伐之宋許之與伐鄭至東門而還二
年鄭伐宋以報東門之役其後諸侯數來侵伐九年大
司馬孔父嘉妻好出道遇太宰華督服虔曰戴公之子督說目
而觀之服虔曰目者極視精不轉也督利孔父妻乃使人宣言國中

曰殤公即位十年耳而十一戰

賈逵曰一戰伐鄭國其東門二戰取其禾三戰

取邾田四戰邾鄭伐宋入其郛五戰伐鄭國長葛六戰鄭以王命伐宋七戰魯敗宋師于管八戰宋衛入鄭九

戰伐戴十戰鄭入宋十一戰鄭伯以號師大敗宋

民苦不堪皆孔父為之我且

殺孔父以寧民是歲魯弑其君隱公十年華督攻殺孔

父取其妻殤公怒遂弑殤公而迎穆公子馮於鄭而立

之是為莊公莊公元年華督為相九年執鄭之祭仲要

以立突為鄭君祭仲許竟立突十九年莊公卒子湣公

捷立湣公七年齊桓公即位九年宋水魯使藏文仲往

弔水

賈逵曰問
凶曰弔

湣公自罪曰寡人以不能事鬼神政不

修故水臧文仲善此言此言乃公子子魚教湣公也十

年夏宋伐魯戰于乘邱

徐廣曰乘一作滕
案杜預曰乘邱魯地

魯生虜宋

南宮萬

賈逵曰南宮
氏萬名宋卿

宋人請萬萬歸宋十一年秋湣公

與南宮萬獵因博爭行湣公怒辱之曰始吾敬若今若

魯虜也萬有力病此言遂以局殺湣公于蒙澤

賈逵曰
蒙澤宋

澤名也杜預曰宋
地梁國有蒙縣

大夫仇牧聞之以兵造公門萬搏牧

牧齒著門闔死

何休曰
闔門扇

因殺太宰華督乃更立公子游

為君諸公子犇蕭公子禦說犇毫

服虔曰蕭毫宋邑也杜預曰今沛國有蕭縣蒙

縣西北有毫城也

萬弟南宮牛將兵圍毫冬蕭及宋之諸公子

共擊殺南宮牛弑宋新君游而立湣公弟禦說是為桓

公宋萬犇陳宋人請以賂陳陳人使婦人飲之淳酒

服虔

曰宋萬多力勇不可執故先使婦人誘而飲之酒醉而縛之

以革裹之歸宋

左傳曰以屏革

裹之宋人醢萬也

服虔曰醢肉醬

桓公二年諸侯伐宋至郊而去

三年齊桓公始霸二十三年迎衛公子燬於齊立之是

為衛文公文公女弟為桓公夫人秦穆公即位三十年

桓公病太子茲甫讓其庶兄目夷為嗣桓公義太子意

竟不聽三十一年春桓公卒太子茲甫立是為襄公以

其庶兄目夷為相未葬而齊桓公會諸侯于葵邱襄公

往會襄公五年宋地實星如雨與雨偕下

左傳曰隕石于宋五隕星

也六鵩退蜚

公羊傳曰視之則六鵩徐察之則退飛

風疾也

賈逵曰風起於遠至

宋都高而疾故鵩逢風却退

八年齊桓公卒宋欲為盟會十二年春

宋襄公為鹿上之盟

杜預曰鹿上宋地汝陰有原鹿縣

以求諸侯於楚

楚人許之公子目夷諫曰小國爭盟禍也不聽秋諸侯

會宋公盟于孟

杜預曰孟宋地

目夷曰禍其在此乎君欲已甚

何以堪之於是楚執宋襄公以伐宋冬會于亳以釋宋

公子魚曰禍猶未也十三年夏宋伐鄭子魚曰禍在此

矣秋楚伐宋以救鄭襄公將戰子魚諫曰天之棄商久

矣不可冬十一月襄公與楚成王戰于泓

穀梁傳曰戰于泓水之上

楚人未濟目夷曰彼衆我寡及其未濟擊之公不聽已

濟未陳又曰可擊公曰待其已陳陳成宋人擊之宋師

大敗襄公傷股國人皆怨公公曰君子不困人於阨不

鼓不成列

何休曰軍法以鼓戰以金止不鼓不戰也不成列未成陳

子魚曰兵以勝

為功何常言與

徐廣曰一云尚何言與

必如公言即奴事之耳又

何戰為楚成王以救鄭鄭享之去而取鄭二姬以歸叔瞻

曰成王無禮其不沒乎為禮卒於無別有以知其不遂

霸也是年晉公子重耳過宋襄公以傷於楚欲得晉援

厚禮重耳以馬二十乘

服虔曰八十匹

十四年夏襄公病傷於

泓而竟卒子成公王臣立成公元年晉文公即位三年

倍楚盟親晉以有德於文公也四年楚成王伐宋宋告

急於晉五年晉文公救宋楚兵去九年晉文公卒十一年楚太子商臣弑其父成王代立十六年秦穆公卒十七年成公卒成公弟禦殺太子及大司馬公孫固而自立為君宋人共殺君禦而立成公少子杵臼是為昭公

昭公四年宋敗長翟緣斯於長邱

魯世宋云宋武公之世獲緣斯於長邱今

云此時未詳

七年楚莊王即位九年昭公無道國人不附昭

公弟鮑革

徐廣曰一賢而下士先襄公夫人欲通於公無革字

乃助之施於國

子鮑不可

服虔曰襄公夫人周襄王之姊王姬也不可鮑不肯也

乃助之施於國

因大夫華元為右師昭公出獵夫人王姬使衛伯攻殺
昭公杵臼弟鮑革立是為文公元年晉率諸侯伐
宋責以弑君聞文公定立乃去二年昭公子因文公母

弟須與武穆戴莊桓之族為亂文公盡誅之出武繆之

族賈逵曰出逐也四年春鄭命楚伐宋宋使華元將鄭敗宋囚

華元華元之將戰殺羊以食士其御羊羹不及左傳曰御羊斟

也故怨馳入鄭軍故宋師敗得囚華元宋以兵車百乘

文馬四百匹賈逵曰文貌文也王肅曰文馬畫馬也贖華元未盡入華元

亡歸十四年楚莊王圍鄭鄭伯降楚楚復釋之十六年

楚使過宋宋有前仇執楚使九月楚莊王圍宋十七年

楚以圍宋五月不解宋城中急無食華元乃夜私見楚

將子反子反告莊王莊王問城何如曰析骨而炊

何休曰析

破人骨也

易子而食莊王曰誠哉言我軍亦有三日糧以信

故遂罷兵去二十二年文公卒子共公瑕立始厚葬君

子譏華元不臣矣共公元年華元善楚將子重又善晉

將欒書兩盟晉楚十三年共公卒華元為右師魚石為

左司司馬唐山攻殺太子肥欲殺華元華元犇晉魚石

止之至河乃還

皇覽曰華元冢在陳留小黃縣城北

誅唐山乃立共公少

子成是為平公

左傳曰魚石犇楚

平公三年楚共王拔宋之彭

城以封宋左師魚石四年諸侯共誅魚石而歸彭城於

宋三十五年楚公子圍弑其君自立為靈王四十四年

平公卒子元公佐立元公三年楚公子棄疾弑靈王自

立為平王八年宋火十年元公母信詐殺諸公子大夫

華向氏作亂楚平王太子建來犇見諸華氏相攻亂建

去如鄭十五年元公為魯昭公避季氏居外為之求入
魯行道卒子景公頭曼立景公十六年魯陽虎來犇已
復去二十五年孔子過宋宋司馬桓魋惡之欲殺孔子
孔子微服去三十年曹倍宋又倍晉宋伐曹晉不救遂
滅曹有之三十六年齊田常弑簡公三十七年楚惠王
滅陳熒惑守心心宋之分野也景公憂之司星子韋曰可
移於相景公曰相吾之股肱曰可移於民景公曰君者
待民曰可移於歲景公曰歲飢民困吾誰為君子韋曰

天高聽卑君有君人之言三焚惑宜有動於是候之果

徙三度六十四年景公卒宋公子特攻殺太子而自立

是為昭公昭公者元公之曾庶孫也昭公父公孫糾糾

父公子禚秦

徐廣曰禚音端

禚秦即元公少子也景公殺昭公

父糾故昭公怨殺太子而自立昭公四十七年卒子悼

公購由立

年表云四十九年

悼公八年卒子休公田立休公田

二十三年卒子辟公辟兵立

徐廣曰一辟公兵

辟公三年卒子

剔成立

年表云剔成君也

剔成四十一年剔成弟偃攻襲剔成

剔成敗犇齊偃自立為宋君君偃十一年自立為王東
敗齊取五城南敗楚取地三百里西敗魏軍乃與齊魏
為敵國盛血以韋囊縣而射之命曰射天淫於酒婦人
羣臣諫者輒射之於是諸侯皆曰桀宋宋其復為紂所
為不可不誅告齊伐宋王偃立四十七年齊湣王與魏
楚伐宋殺王偃遂滅宋而三分其地

年表云偃立四十年

太史公曰孔子稱微子去之箕子為之奴比干諫而死
殷有三仁焉

何晏曰仁者愛人三人行異而同稱仁者何也以其俱在憂亂寧民也夏侯玄曰微

子仕之窮也箕子比干志之窮也故或盡材而止或盡心而留皆其極也致極斯君子之事矣是以三仁不同

而歸其

春秋譏宋之亂自宣公廢太子而立弟

公羊傳曰君子

大居正宋之禍宣公為之也

國以不寧者十世襄公之時修仁行義

欲為盟主其大夫正考父美之故追道契湯高宗殷所

以興作商頌

韓詩商頌章句亦美襄公

襄公既敗於泓而君子或以

為多

公羊傳曰君子大其不鼓不成列臨大事而不忘大禮有君而無臣以為雖文王之戰亦不過此也

傷中國闕禮義褒之也宋襄之有禮讓也

史記集解卷三十八